

Der selben wißheytt stellten noch
Pythagoras / Plato der hoch
Socrates / vnd all die durch jr ler
hant ewig rüm erholt / vnd ere
Vnd kunden doch ergründen nie
Die rechte wißheytt funden hie
Dar vmb von in spricht got der her
Ich will verwerffen kunst vnd ler
Vnd wißheytt der / die hie wis sindt
Leren die selb / die kleyne kindt /
Das sint all die / so wißheytt handt
Eruolget dort im vatter landt /
Die solche wißheytt hant gelert
Werden in ewigkheyt geert
Vnd schynen wie das firmament
Welch hant gerechtigheyt erkent
Vnd dar inn vnder wysen sich
Vnd ander me / die lüchten glych
Als Lucifer von orient
Vnd Hesperus gen occident /
Bion der meister spricht / das glych
Wie zu den megten gselten sich
Sie vmb Penelope langzyt
Bülten / vnd möcht in werden nit /
Als dünt die hie nit können gantz
Bgriffen / der rechten wißheytt glantz
Sie nahend durch vil tugent zier /
(Die jr megd sint) doch vast zu jr /
All freüd der welt nymbt trurig end
Eyn yeder lüg / wo er hyn lend

